

Persisi perlu pakar Indon latih anggota2

PERAKA / SILAT

16 FEB 1985



ENCIK JOHARI URIF
...tambah pengalaman tentang silat di Eropah

PERSEKUTUAN Silat Singapura (Persisi) merancang untuk mendapatkan kepakaran seorang jurulatih silat dari Indonesia, melatih beberapa orang anggota yang bakal mengikuti rombongan Persisi ke Negeri Belanda lewat tahun ini.

Kepakaran jurulatih itu diperlukan untuk memimpin anggota-anggota silat sebagai persiapan bukan saja untuk lawatan itu tetapi juga untuk Pertandingan Silat Antarabangsa yang dijangka diadakan di Jerman Barat atau Austria dalam 1986.

Mengumumkan rancangan itu, Setiausaha Agung Persisi, Encik Johari H.M.Uriff, berkata Persisi

kini sedang berusaha untuk memilih enam orang untuk mengikuti rombongan itu.

Encik Johari selanjutnya berkata, jurulatih dari Indonesia itu diperlukan selama antara dua dengan tiga minggu bagi membantu para peserta menyiapkan diri untuk pertandingan besar itu.

Beliau menambah, seramai enam orang akan dipilih daripada kalangan anggota Persisi. Mereka akan ditemani oleh empat orang pegawai.

Menjelang pertandingan tersebut, rombongan Persisi akan melakukan lawatan ke Negeri Belanda untuk 'menyesuaikan diri' dengan keadaan di sana memandangkan iklim negeri itu sama dengan Jerman Barat dan Austria.

Dalam lawatan itu nanti, mereka merancang untuk mengadakan ceramah mengenai perkembangan silat di samping mengadakan persembahan.

Rancangan untuk menghantar satu rombongan ke Negeri Belanda dibuat ekoran daripada undangan satu pasukan silat dari negeri itu ketika mereka bertemu dalam Pertandingan Silat Antarabangsa di Jakarta, lewat tahun lalu.

"Kami akan mengadakan lawatan sambil belajar untuk menambah pengetahuan dan pengalaman mengenai corak silat di Benua Eropah," kata Encik Johari lagi.

Besar

Para anggota yang bernasib baik mewakili Persisi dalam latihan itu perlu mempunyai tiga perkara penting, katanya.

Ini termasuklah pengalaman dalam bidang silat olahraga — perkara yang diberi keutamaan oleh Persisi — saiz badan yang besar, setanding dengan pesilat dari Eropah dan kelakonan serta disiplin yang baik.

Setelah pemilihan itu, jurulatih silat olahraga Indonesia itu akan didatangkan ke sini untuk memberikan latihan intensif kepada mereka, katanya.

"Kalau pun kita tidak dapat mengalahkan pesilat-pesilat Eropah, sekurang-kurangnya kita dapat menandingi mereka," kata Encik Johari lagi.

Walaupun tarikh lawatan itu ialah dalam Oktober, Persisi kini juga sedang giat untuk mendapatkan bantuan kewangan bagi menjayakan rancangan tersebut.

Encik Johari berkata Persisi memerlukan kira-kira \$20,000 untuk tujuan itu.